

IKHWAN AL-MUSLIMIN, BERSATULAH SEKARANG....!


PERJANJIAN, PENGAKUAN DAN IKRAR KITA KEPADA AGAMA.

Kalau kita perhati keadaan dan kedudukan umat Islam hari ini terutamanya di Semenanjung Tanah Melayu ini, dengan terang dan jelas bolehlah disebut yang terbanyaknya, orang-orang pembohong, mungkir janji atas tanggungan-tanggungannya untuk berjihad kepada jalan Allah, jihad yang mana dituntut oleh Allah ke atas mereka itu dan mereka itu sendiri telah mengaku bahawa kehidupan dan yang ada kepada mereka adalah semata-mata menjadi pengorbanan mereka untuk agama mereka. Mengapa dikatakan mereka itu pembohong dan mungkir janji?

Tiap-tiap seorang Islam , pada permulaan ia mengaku dan niat saksi bahawa tidak ada Tuhan yang disembah melainkan Allah dan Nabi Muhammad itu pesuruh Allah dan sebagai tiangnya pula untuk ditetapkan ikrarnya itu maka atasnya diwajibkan mengerjakan fardu sembahyang lima kali sehari.

Di dalam pengakuan yang pertama bahawa dengan terang ia berkata mengaku menyaksikan bahawa Tuhan itulah yang disembahnya dan ia sebagai hamba sudah tentu tetap mengikut kepada perintah-perintah-Nya yang disampaikan oleh rasul-Nya Muhammad (SAW) yang di dalamnya tidak akan ada suatu persamaan berbelah bagi bagi menjalankan perintah-perintah-Nya dan tegahan-teghan-Nya yang semuanya telah ditunjukkan oleh pesuruh-Nya yang mulia itu. Apakah yang ditunjukkan oleh pesuruh-Nya yang mulia itu supaya umat Islam menjadi khalifah di bumi Allah ini ialah bahawa yang pertama sekali akhlak atau budi pekerti sehingga sebelum lagi junjungan kita itu menjadi Rasul ia telah dapat menjadi perhatian dan tumpuan orang-orang Arab yang sebegini keras dengan sebab budi pekertinya dan dengan kerana itulah maka diutuskan ia ke dunia ini dengan akhlak yang sebegini tinggi

sehingga apabila cara-cara itu telah dijalankan oleh orang-orang yang kemudiannya dengan telus dan ikhlas maka merebaklah ke serata dunia pengikut-pengikutnya tetapi apabila yang kemudiannya telah rosak akhlaknya, telah rosak budi pekertinya maka asas keruntuhan Islam itu telah mulai timbul yang kemudiannya dari semasa ke semasa Islam telah runtuh dan Islam telah dijajah di mana-mana tempat jua pun di dalam dunia ini dengan kerana pengajur-pengajurnya dengan kerana orang-orangnya dengan kerana masyarakatnya telah rosak akhlaknya telah rosak budi pekertinya sehingga melakukan pekerjaan maksiat dan



Sebahagian daripada orang-orang haji yang baru balik dari Mekah menunaikan fardu haji. Mereka bergembira telah menunaikan fardu haji yang tersebut tetapi adakah mereka akan menunaikan janji setiap hari menumpukan segala usaha dan tenaganya untuk Allah?

batil itu sebagai suatu kemegahan , sebagai suatu

kemuliaan.

Apabila budi pekerti telah binasa, apabila perangai telah runtuh maka timbullah anasir-anasir luar meruntuhkan lagi akhlak dan budi pekerti kita dan timbulah fahaman-fahaman di dalam orang kita yang mengatakan bahawa agama Islam itu hanyalah agama beribadat sahaja, agama kulit dan yang demikian ini, faham yang demikian ini terbitnya bukannya hanya daripada orang-orang jahil bahkan ada juga dari orang ahli-ahli agama sendiri yang telah berpendapat sedemikian itu bahkan ada juga yang telah dipandang sebagai ulama membelakangkan hak-hak agama padahal, mengikut pengakuannya , sebagai ahli di dalam mazhab Syafie bahawa ibadatnya , hidupnya, pengorbanannya semata-mata untuk Allah, ia taat dan mengaku tidak ada Tuhan yang disembah melainkan Allah tetapi perjalanan kehidupannya berkurban kerana lain, berkurban kerana orang lain yang di dalamnya tersembunyi tujuan-tujuan anasir-anasir yang akan menghapuskan, jika boleh, agama Islam di dalam negeri kita ini.

Mengapa saya katakan begitu? Jawabnya tidakkah kita melihat bahawa siapa orangnya kita ikut? Ialah orang-orang yang bertopengkan agama, ialah orang-orang yang menggalakkan orang-orang kita melakukan pekerjaan-pekerjaan asi, ialah orang-orang yang tidak bersilu-silu lagi dihadapan mata umat meminum khamar yang ditunjukkan oleh rasul kita yang mulia sebagai punca melakukan segala kejahatan bagi orang-orang yang meminumnya. Adakah kita akan mengikut atau adakah kita akan menjadi pengikut kepada orang-orang yang sifatnya sedemikian itu dan adakah sebahagian daripada kita terutamanya ahli-ahli agamanya redha bersyubhat kepada mereka, redha dijadikan terompet, redha dijadikan tukang azan untuk memanggil orang dan apabila orang-orang telah berkumpul dan apabila orang-orang telah berhimpun mereka dijadikan perkakas untuk orang-orang yang asi, mereka dijadikan alat untuk kemuliaan dan nama padahal di sebaliknya mereka itu menentang ajaran-ajaran Islam – berlindunglah kita kepada Allah daripada sifat-sifat

yang demikian itu.

Ikhwanul muslimin – ingatlah kita telah mengaku selama lima kali satu hari bahawa segala-galanya atas diri kita adalah untuk agama kita, lihat di dalam ibadat kita – yang pertama kita mengaku tidak ada Tuhan yang disembah melainkan Allah dan nabi Muhammad itu pesuruh Allah, yang kedua kita mengaku sembahyang kita perbuatan kita dan kehidupan kita semata-mata untuk Allah, puasa kita untuk meletakkan budi pekerti persamaan dan berihsan kepada makhluk Allah, disuruh kita berzakat dan bersedekah supaya kita mempunyai tanggungjawab kepada masyarakat kita dan kemudian kita menunaikan fardu haji berhimpun bersama-sama menyatakan persaudaraan dengan satu sebutan labaikallah hummalabbaik – inilah hambamu memenuhi panggilanmu.

Panggilan yang akhir akan tiba kepada tiap-tiap kita, bukannya panggilan berselaput dengan pengakuan-pengakuan pendusta, mengaku berkurban kepada jalan Allah, mengaku kehidupannya semata-mata untuk Allah tetapi tiada mengendahkan perintah-perintah Allah, mereka memaki haji tetapi mereka pendusta, mungkir kepada janji-janji berkurban kepada jalan Allah untuk meninggikan syiar Islam, tetapi panggilan yang akhir, panggilan yang penyudah di mana ditanya apa yang telah kamu korbankan dan apakah yang kamu telah beri dan apakah yang kamu telah tunaikan ke atas janji-janji kamu dalam masa kamu berupaya, dalam masa kamu memberi pengakuan selama lima kali satu hari untuk berkurban kepada jalan Allah.

Ingatlah! Di dalam masa kita tidak dapat lagi berdusta – kita tidak dapat lagi berdalih dan sebab itulah dari sekarang supaya masyarakat kita mesti ingat kepada tanggungan-tanggungan masing-masing bersama, berkurban kepada jalan Allah selama ada hayat kita adanya.-Abu Bakar Sakiran.

Kalau badanmu kuat hendaklah engkau mengerjakan perintah Allah dan kalau badanmu lemah hendaklah engkau lemah pada mengerjakan maksiat. – Baginda Ali.